

汾陽縣志

汾陽縣志序



志以佐史也史必擅三長而後成則修志者亦非此不能勝其任然史才無兼備或文采有餘而識見不足或博覽能該而剪裁莫辨無論穢史郎公穀班馬昔人皆有指摘况下焉者雖然逞已智則難成

集衆長則易備又何患三長之不繼哉余自巳亥夏承之茲土爰閱邑乘知創自王刺史而修於孔方伯繼經王侍郎之纂輯劉別駕之叅稽宜乎備矣然不無遺議卽如汾陽邑名久著春秋而以爲漢始則疎矣汾陽封爵實係此州而以

爲陽曲則誤矣記仙釋而反斥孟子爲有僞則悖矣遺流寓而卽以卜子爲鄉賢則混矣且魯魚帝虎舛錯滋多草木蟲魚漏遺不少況此志不修者已六十餘年將恐芳軌異績湮沒無傳良爲可惜時卽有志纂修無如簿書鞅掌又值旱

災遑遑補救何暇涉獵參考辛丑秋哀鴻已集始得從事簡編又苦聞見不廣幸有趙滋大日昌博洽留心早成手錄則草創是資適家孟友琦于韓在署任其討論又特延華亭邢寶一秉誠爲之修飾焉余雖不敢當潤色之功然亦時勤

較閱必期考核精詳方得付梓於
是乎前後次序之無紊也是非好
惡之不謬也繁文縟節之悉芟也
疎忽罅漏之必補也三豕已亥之
盡正也質而燦簡而括文而不浮
幾幾乎一代之完書矣是編也四
君子遞纂於前三君子續叅於後

余又不揣庸鄙兢兢詳慎焚膏繼
晷以祈速竣雖未必如史才之兼
備而集衆人之長不大遠於逞一
己之智者哉嗟嗟誰毀誰譽固以
維世而知我罪我亦以任人第能
稍有益於世道人心有助於

聖朝文獻俾後有繼修者倘得免於

指摘而便於取裁斯亦幸爾是爲序

時

康熙辛丑嘉平穀旦

賜進士出身文林郎庚子科鄉試同
考官知汾陽縣事加一級紀錄二
次古虞周超錦川甫撰

汾陽縣志

序

四



重修汾陽縣志序

明嘉靖甲寅前吾汾尙無志也邑人王龍岡草創之其後孔文谷王龍洲相繼纂述然皆州志耳改府後設附郭邑名曰汾陽邑侯尹覺民重修之我

朝順治十二年劉別駕增補之亦幾

備矣但剗削不工魯魚亥豕之訛所不免焉且迄今六十餘年山川形勝或無大異而戶口丁徭地畝錢糧官師科甲名媛懿德皆當補載誠齋沈公祖來守是邦嘗閱府志係萬曆己酉年作今近百年遺漏不少然必各州縣志成而後

府志可纂乃各屬皆有新志而汾陽獨缺此守土之責而亦此邦士大夫之耻也因飭汾令而屬予纂修焉時余承命愧未逮康熙十一年相國衛周祚疏纂各省通志彙爲一統全書忽值滇閩之變各州縣志書有繳者有未繳者有刊入

新事蹟者有仍照舊版翻刻塞責者而汾邑舊編頗殘缺失次今承平日久文教修明編類纂述誠屬大典未幾沈公致政事遂寢茲上虞周父母以名進士來宰是邑卽慨然有志邑乘之修而仍以屬余余雖不敢推諉但邑中過余者

指不勝屈而乃惟弁鄙無文之昌
是問乎且自惟固陋時常閉戶一
邑之事安能周知矧當運會變遷
其中豈無不能悉書者乎又豈無
不欲悉書不必悉書者乎好惡異
同參差牴牾倘稍違其見必且議
之爲阿目之爲諛指之爲妄叱之

爲僭不幾爲衆射之的羣怨之府
耶史記漢書千年絕調人猶訾議
之况本非三長五至者哉而周父
母則以爲余生于斯長于斯聚于
斯者旣久則耳而目于斯者必悉
斟酌剪裁舊志之成憲宜遵故老
之傳聞可考縉紳之徽猷當訪卽

間巷歌謠亦可芟其穢蕪飾以雅
馴以光大典又何人言之足慮余
謝不獲乃遵成憲考故老訪徽猷
採歌謠凡邑之肇置本末與夫分
野所屬山川所表溝池土地之綿
歷戶籍貢賦之盈縮風俗土產之
宜宦蹟人物之衆縣治庠序壇墀
汾陽縣志

序

八

郵傳剏建之始僧寺祠觀橋梁陂
池存毀之迹仙釋之有無文士之
題咏靡不博採而備錄之鍵戶數
月始克告竣周覽之色喜以
爲旣得大槩是卽成志之基也由
是刪繁就簡補偏救弊潤色而成
一邑之完書矣因慨然捐俸授梓

人鑄刻余豈敢矜訂正之工哉是
皆周父母得人詳慎考訂之所由
致也云爾邑人趙日昌題於葫蘆
谷之葆光齋時己亥年仲冬也



重修汾陽縣志序

已亥夏上虞周父母以名進士
來宰吾汾下車之始卽有別弊振
衰之志善良者卵翼之豪強者芟
鋤之公務之餘流覽邑乘慨然曰
志修於我

朝定鼎之初去今六十年餘賦役豈

無增損乎生齒豈無盛衰乎忠孝
節義豈無可法可傳者乎科第中
豈無雋品山林中豈無高士乎山
川如故景物不殊而人往風微採
擇何自爰集予等而謂之曰彰明
往蹟以勵來茲守土者之任也各
出所長以校訂可否亦此邦士大

夫之責也諸君與予共成厥事可
乎維時孝廉滋大趙公高尚不仕
惟曰杜門著書先時 太守沈公
祖曾以邑志相屬而事不果今遺
稿猶存 周父母取而覽之喜曰
草創有人而循名核實吾其與衆
共之爰敦請華亭名宿寶一邢公

並難兄友琦公相爲校正無何饑
饉類仍哀鴻徧野煮粥濟飢日不
暇給此事中閣者又復二年今流
民甫集簿書之餘親爲叅閱詳妥
遂付剞劂予於此有感焉夫分野
疆域無論已倉儲驛站兵食等雖
有成規亦隨時遞更吏胥因緣爲

奸典冊昭然猶多侵蝕况考據失
實乎若夫忠孝節義原本性生世
或以夤緣而得美名位高金多文
飾者衆爲忠臣立石矣爲孝子懸
匾矣爲節婦建坊矣試問此輩殷
實家乎抑單寒族乎而華門圭竇
之中苦節終身其名磨滅而不傳

者何可勝道鄒吉士云事垂青史
定誰真信已我周父母洞見弊
端至公之心行之以至慎凡有關
國計民生者開載詳明瞭如指掌
至於忠義實關風化不憚詢其始
末而論定之其餘一名一物一詩
一賦罔不去取精嚴可垂永久矣

予承乏粵東自愧不能贊一詞乃
遙聞是舉而樂爲叙之
廣東肇慶府知府加一級紀錄二
次韓謨介菴甫撰



汾州舊志序畧

冀南道彭公範

郡有志猶國有史也第崇文者鮮實要稽事者失雅馴好古綴文之士每以爲恨余往閱武功志文簡事該心竊慕之及分鎮西河暇覽郡乘繁畧互失乃造文谷孔公而問焉曰郡有善志則邦多聞人汾志未修非缺典乎公遂慨諾旁搜博採按舊擇新實則據事而直書文則刪繁以就簡地里志而圖籍可察矣建置志而興廢可稽矣藩封志而茅旌有徵矣祠祀志而秩宗不廢矣

汾陽縣志

舊序

田賦志而惟正可供矣官師志而才賢可辨矣人物志而尚友有資矣選舉志而賢能不蔽矣志取旣精于決擇發論不謬于是非較武功而藻飾過之矣雖謂汾史可也

邑人王公緯

余惟志之匪易修也傷繁則涉於支太簡則病于滲容私則致譽競於多岐徇情則名實淆於罔覈祇取誣焉爾余乃躬歷四境咨訪搜羅西至禹門登萬戶山過向陽坂踰金鎖關跨龍橋陟彪嶺俯瞰馬跑之泉轉北徑卜山探石室遡隱泉東下涉萬谷河循汾水之涯迤邐而南抵中陽界旋謁狄武襄祠過文潞公舊宅訪宋之問故墟凡山河之形勝人物之遺跡建置之因革無不手錄復稽覈典章參考圖籍兩更寒暑稍稍完此數篇

汾陽縣志

舊序

二

心力亦既竭矣

邑人孔公天爵

冀南五州汾志獨無郡守陳公三致意焉敦求鄉進士
龍岡王緯開館撰次數月書成存名物於故事寥絕之
餘創圖史於草藁莫屬之後其有功於郡豈不鉅哉余
廢著嘿塞杜門絕省問分守東谿彭公約州守龍喁張
公別駕少陂黃公下問焉曰古之閉戶者率著書今君
安得嘿然而已乎幸勉爲修志余於是取郡志修之定
爲八卷曰地里曰建置曰藩封曰祠祀曰田賦曰官師
曰人物曰選舉合而觀之則一郡之事聊可舉而半因

汾陽縣志

舊序

三

於王君之所搜討益信其爲國史才不可沒也至於弘
備精覈尙有望於博雅君子焉嘉靖己未九月始庚申
正月銀梓